

CONVENIO DE COLABORACIÓN ENTRE A CONSELLERÍA DE ECONOMÍA E INDUSTRIA E O CLÚSTER DE AUTOMOCIÓN E MOBILIDADE DE GALICIA PARA A POSTA EN MARCHA DO PLAN DE ACOMPAÑAMENTO E DIVERSIFICACIÓN DAS CAPACIDADES PRODUTIVAS DAS EMPRESAS DE AUTOMOCIÓN QUE SE ATOPAN EN DIFICULTADES POLO TRÁNSITO AO VEHÍCULO ELÉCTRICO NO MARCO DE DESENVOLVEMENTO DO PLAN DIRECTOR DE AUTOMOCIÓN

(Asinado electronicamente o 19/02/2026)

REUNIDOS

Dunha parte, _____, en nome e representación da Consellería de Economía e Industria, co NIF _____ e domicilio en Edificio Administrativo San Caetano, s/n, 15704, Santiago de Compostela, na súa calidade de conselleira segundo nomeamento recollido no Decreto 44/2024, de 14 de abril. Está facultada para este acto en virtude das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia; o Decreto 140/2024, do 20 de maio, polo que se establece a estrutura orgánica da Consellería de Economía e Industria; e o Decreto 42/2024, do 14 de abril, polo que se establece a estrutura orgánica da Xunta de Galicia.

Doutra parte, _____, con NIF _____, en calidade de _____ do Clúster de Automoción e Mobilidade de Galicia (CEAGA) e con capacidade e lexitimación legal suficiente en virtude do poder outorgado con data de 26 de febreiro do 2007, con NIF _____ e con enderezo na _____.

Interveñen en función dos seus respectivos cargos e no exercicio das facultades que, para convir en nome das entidades que representan, teñen conferidas e

EXPOÑEN

I.- Que a Consellería de Economía e Industria é o órgano da Administración Xeral da Comunidade Autónoma de Galicia ao cal lle corresponde o exercicio, entre outras, de funcións en materia de promoción e dinamización da economía, impulso e coordinación da política económica e industrial, apoio ao sector empresarial e mellora da competitividade das empresas, incidindo no desenvolvemento tecnolóxico e a innovación, na transformación dixital, na sustentabilidade e na internacionalización.

II.- Que o Decreto 140/2024, do 20 de maio, polo que se establece a estrutura orgánica da Consellería de Economía e Industria, dispón a creación da Secretaría Xeral de Industria e Desenvolvemento Enerxético como novo órgano de dirección ao que se lle atribúen, entre outras, a dirección, coordinación, planificación, execución, seguimento e control das competencias e funcións da Consellería en materia de industria.

Así mesmo, dispón que, baixo a superior dirección da persoa titular da Secretaría Xeral de Industria e Desenvolvemento Enerxético, a Dirección Xeral de Estratexia Industrial e Solo Empresarial exercerá as competencias e funcións en materia de estratexia industrial, e o desenvolvemento, promoción e coordinación da política industrial dentro da Comunidade Autónoma de Galicia en colaboración cos distintos departamentos da Xunta de Galicia.

III.- Que, segundo establece o artigo 61 do Texto Refundido das disposicións legais da comunidade Autónoma de Galicia en materia de política industrial, aprobado polo Decreto Legislativo 1/2015, do 12 de febreiro, os plans directores son instrumentos de carácter estratéxico que teñen como fin potencial o desenvolvemento da actividade industrial no sector concreto que corresponda, a través da definición das medidas necesarias para o seu impulso, de cara a avanzar no fortalecemento de todo o sector industrial da Comunidade Autónoma de Galicia e na conseguinte creación e mantemento do emprego industrial.

As medidas incluídas no plan dirixíranse a fortalecer o sector industrial, mellorando a competitividade das industrias actuais, fomentando a súa internacionalización, favorecendo a sustentabilidade e impulsando a innovación industrial dos seus procesos produtivos, co fin de incrementar o emprego industrial de calidade na comunidade Autónoma de Galicia. Igualmente, as medidas estarán dirixidas a estimular a captación de investimento no sector que supoña un reforzo do tecido industrial de Galicia, reforzando as sinerxías sectoriais e /ou intersectoriais.

IV.- Que o Plan director de automoción foi aprobado no Consello da Xunta de Galicia o día 17 de marzo do 2025. No marco do compromiso co desenvolvemento industrial sustentable e a promoción da competitividade do sector, levouse a cabo unha análise exhaustiva da súa situación, proporcionando un contexto sólido e detallado para o deseño de intervencións específicas. Por este motivo, a Xunta de Galicia articulou medidas extraordinarias incluídas no plan director e dirixidas a apoiar os investimentos de equipamentos, sistemas, obras e consultaría de proxectos de futuro ante a transición do sector, así como proxectos de aforro e eficiencia enerxética ou de aproveitamento de enerxías renovables.

Dentro do sistema de gobernanza do plan, constituíuse a Comisión sectorial de automoción, que funciona como órgano de seguimento e avaliación deste. Esta comisión está integrada por persoal da Consellería de Economía e Industria e por representantes do Clúster de Automoción e Mobilidade de Galicia, como clúster de referencia e axente aglutinador do sector da automoción galega.

Neste contexto, no seo da antedita comisión, detectouse a existencia de empresas cuxas liñas de negocio vense directamente afectadas polos novos requirimentos do vehículo eléctrico e os cambios na produción, circunstancia que as coloca nunha situación crítica que precisa, en moitas ocasións, dunha necesaria diversificación das súas capacidades produtivas cara a outras cadeas de valor afíns nas que atopar novos nichos de mercado.

V.- Que o Clúster de Automoción e Mobilidade de Galicia (en adiante CEAGA), é unha entidade non lucrativa que aglutina toda a cadea de valor da automoción galega conformando un completo

ecosistema colaborativo de innovación con máis de 200 compañías, ás que se suman as máis de 80 startups creadas no seo da aceleradora Business Factory Auto & Mobility.

Segundo consta na información proporcionada desde a entidade, CEAGA ten como obxectivo principal situar ao sector de automoción e mobilidade de Galicia nunha posición de liderado sustentable e competitivo a nivel global no horizonte 2030, contribuíndo ao progreso e á calidade de vida da nosa contorna. Con este obxectivo promove proxectos cooperativos de alto impacto para mellorar a competitividade das empresas e da industria da automoción e mobilidade de Galicia. Así mesmo, conta con outros obxectivos dirixidos a mellorar a competitividade, a innovación e capacidade tecnolóxica, a cooperación sectorial e a flexibilidade de adaptación aos cambios do mercado.

Este clúster goza do recoñecemento do Ministerio de Industria, Comercio e Turismo (Mincotur) que o mantén no seu rexistro como Agrupación Empresarial Innovadora "Excelente". No ámbito internacional, mantén a súa posición como un dos clústeres mellor xestionados da Unión Europea, segundo a Secretaría Europea de Avaliación de Clústeres (ESCA). De feito, tras a auditoría realizada de novo no 2025, a ESCA renovou a acreditación "Gold Label" a CEAGA por demostrar un alto nivel de excelencia na súa estratexia, servizos e xestión, recoñecemento que lle permite formar parte do Grupo de Expertos de Clústeres Excelentes (CEEG).

VI.- Que, en liña co desenvolvemento, promoción e coordinación da política industrial e da necesidade detectada a través da Comisión sectorial de seguimento do Plan director de Automoción, estase a promover por parte da Consellería de Economía e Industria, en colaboración con CEAGA, a posta en marcha dun plan de detección, acompañamento e diversificación das capacidades produtivas das empresas de automoción que se atopen en dificultades polo tránsito ao vehículo eléctrico e/ou en risco de exclusión ao dedicarse a cadeas de subministración asociadas a motores de combustión.

Ambas as dúas partes comparten unha finalidade de colaboración e cooperación que se enfoca neste obxectivo común, implicando achega de recursos e responsabilidades mutuas para un fin de interese público. Os devanditos recursos consisten en achegas económicas, así como nunha contribución en materia de coñecemento, experiencia, organización, planificación, deseño, lanzamento e execución, que será distribuída entre as partes de acordo coa vontade compartida e aproveitando as sinerxías dos recursos técnicos e humanos de ambas as dúas entidades.

VII.- Que para a consecución dos obxectivos enunciados no punto anterior, as partes consideran de mutuo interese establecer fórmulas de colaboración que permitan executar as distintas accións encamiñadas ao cumprimento dos ditos obxectivos, xa que non se contemplan prestacións propias dos contratos regulados na Lei 9/2017, de 8 de novembro, de contratos do sector público. Entre esas fórmulas de colaboración, considérase a máis axeitada a figura do convenio entre unha Administración Pública (Consellería de Economía e Industria) e un suxeito de Dereito privado (a CEAGA), ao abeiro do artigo 47.2 letra c) da Lei 40/2015, do 1 de outubro, de réxime xurídico do sector público.

Por todo o exposto, ambas partes acordan subscribir o presente convenio, que se rexerá polas seguintes:

CLÁUSULAS

Primeira.- Obxecto do convenio

O obxecto deste convenio é a posta en marcha dun plan de detección, acompañamento e diversificación das capacidades produtivas das empresas de automoción que se atopan en dificultades de adaptación aos novos requirimentos produtivos asociados ao vehículo eléctrico, dentro do marco de desenvolvemento do plan director de automoción.

Para acadar este obxectivo, levaranse adiante as seguintes actividades:

Actividade 1 - Plan de Acompañamento.

Esta actividade implicará a monitorización e detección temperá de empresas en dificultades dentro da industria da automoción galega.

Para establecer un sistema de detección continuo, CEAGA realizará unha monitorización do sector establecendo un proceso continuo de vixilancia dirixido a identificar e avaliar riscos potenciais, así como ameazas e sinais de alerta.

Como resultado desta actividade, elaborárase un informe de situación onde se presentará un mapeo de toda a cadea de valor da automoción galega, identificando as empresas que se atopan con dificultades para poder adaptarse á transición ao vehículo eléctrico. Estas empresas virán categorizadas, atendendo ao tipo de dificultade detectada, e formarán parte dun plan de acompañamento onde se traballará de forma colaborativa e consensuada nunha posible redefinición estratéxica.

Actividade 2 - Plan de diversificación.

Esta actividade ten por obxecto pór en marcha un plan de diversificación para as empresas integradas no plan de acompañamento. Esta actuación constará dunha serie de fases: análise de situación, identificación de novos mercados e/ou produtos relacionados, asesoramento financeiro e busca de novas alianzas estratéxicas.

Esta estratexia de diversificación empresarial conectará as capacidades destacadas das empresas con outras cadeas de valor, co fin de aproveitar os procesos produtivos existentes e multiplicar as súas oportunidades de negocio, aproveitando os contactos estratéxicos dos que dispón CEAGA. Como posibles cadeas de valor complementarias poderíamos nomear as seguintes:

- Defensa e seguridade
- Aeronáutico
- Aeroespacial
- Mobilidade lixeira: e-bikes, motos, bicicletas...
- Robots humanoides
- Construción industrializada
- Naval

- Trens
- Autobuses

CEAGA realizará esta función de asesoramento empresarial, sen prexuízo das competencias propias do Instituto Galego de Promoción Económica (IGAPE) e, particularmente da Oficina Económica de Galicia. Así mesmo, informará á Secretaría Xeral de Industria e Desenvolvemento Enerxético de cada unha das actuacións postas en marcha presentando diferentes documentos executivos. Concretamente:

- Análise inicial de oportunidades de diversificación en cadeas de valor complementarias.
- Contraste do punto anterior coas capacidades e potencialidades de diversificación das empresas integradas no plan de acompañamento.
- Informes de seguimento e resultados de cada asesoramento e apoio realizado a empresas con potencialidades e interese na diversificación.

Desde a Consellería de Economía e Industria poderán proporse, se é o caso, medidas adicionais ou de apoio que reforcen o plan.

Segunda.- Obrigas da Consellería de Economía e Industria

1. Colaborar no desenvolvemento daquelas iniciativas e accións vinculadas ao obxecto do convenio para asegurar o seu cumprimento.
2. Supervisar que as actividades sexan desenvolvidas de acordo coas estipulacións do presente convenio e ditar as instrucións que se estimen precisas para a referida colaboración.

Terceira.- Obrigas de CEAGA

1. Colaborar coa Consellería de Economía e Industria no desenvolvemento das actividades obxecto do convenio, seguindo as liñas de actuación establecidas na cláusula primeira.
2. Con carácter previo á sinatura deste convenio e xunto coa solicitude de pagamento, deberá acreditar ante a Consellería de Economía e Industria que se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración Pública da Comunidade Autónoma, no caso de que se opoña á consulta automatizada deses datos prevista na cláusula décimo terceira deste convenio.
3. Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas ou o Consello de Contas, no exercicio das súas respectivas funcións de fiscalización e control de destino dos fondos transferidos e facilitar a inspección e control dos órganos da Consellería de Economía e Industria co fin de supervisar o cumprimento das actividades do convenio.

4. Seguir as normas sobre protección de datos, concretamente a Lei orgánica 3/2018, de 5 de decembro, de protección de datos persoais e garantía dos dereitos dixitais.

5. Achegar os informes e documentos que acrediten o desenvolvemento das actividades do presente convenio, así como os informes e demais documentos requiridos pola Consellería de Economía e Industria.

6. Facer constar expresamente a colaboración prestada pola Consellería de Economía e Industria en todo o material de execución, información e publicidade das actividades do convenio, coa utilización do correspondente logotipo identificativo, en virtude do disposto no Manual de Identidade Corporativa da Xunta de Galicia.

Cuarta.- Contía da achega económica

Para o desenvolvemento das actuacións previstas no convenio, a Consellería de Economía e industria achegará a cantidade máxima de sesenta e cinco mil euros (65.000€), que se financiarán con cargo á seguinte aplicación orzamentaria, código de proxecto e anualidade seguinte:

Código proxecto	Aplicación orzamentaria	2026	TOTAL
2024 00034	09.02.732A.640.8	65.000€	65.000€

Esta achega económica realizarase como unha compensación dos gastos nos que incorra CEAGA para a axeitada execución das accións obxecto do convenio. En ningún caso se aboarán importes que supoñan a obtención de lucro por parte da dita asociación.

Quinta.- Gastos atendibles

Con carácter xeral, considéranse gastos atendibles aos efectos do convenio aqueles que, de xeito indubidable, responden á natureza das actividades e fins do convenio.

Os conceptos de gastos que se inclúen son:

- Gastos de persoal: custos salariais do persoal de CEAGA asignado ao convenio.
- Gastos de servizos: contratación de terceiros para atender as cuestións técnicas vinculadas ao desenvolvemento do obxecto do convenio

Requisitos dos gastos con cargo ao convenio:

Os gastos deberán ser realizados, facturados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas entre a data da súa sinatura e a data límite de xustificación, de conformidade co prazo sinalado na cláusula sexta. Exceptúanse aqueles gastos cuxos pagamentos deban efectuarse nun momento

posterior por axustárense aos calendarios de recadación, como os ingresos á conta do IRPF ou cotas de seguros sociais.

O importe do IVE (imposto do valor engadido) non se considerará gasto xustificable cando sexa susceptible de recuperación ou compensación, salvo que se acredite a exención do mesmo e consecuentemente non resulte recuperable.

Os gastos nos que incorra CEAGA serán compatibles con outras cantidades públicas ou privadas que puidese recibir, que deberán ser declaradas nas liquidacións do convenio e diminuirán o importe total a achegar pola Consellería de Economía e Industria.

Todos os gastos externos xustificados por CEAGA deben axustarse a prezos de mercado, polo que podería solicitarse unha auditoría sobre os gastos xustificados, no caso de que non exista outro patrón de público coñecemento que permita establecer o dito axuste.

Sexta.- Xustificación e pagamento das contribucións da Consellería de Economía e Industria

1. A Consellería de Economía e Industria achegará para o financiamento do custo das accións previstas no presente convenio un importe total máximo de sesenta e cinco mil euros (65.000€). Esta cantidade será aboada con cargo aos orzamentos da Xunta de Galicia para o ano 2026, nos que se dotará crédito axeitado e suficiente para financiar ata o 100% esta achega, conforme á partida orzamentaria 09.02.732A.640.8.

2. A contribución da Consellería de Economía e Industria poderá realizarse de xeito fraccionado en pagamentos que estean vinculados á realización e acreditación das actividades relacionadas na cláusula primeira deste convenio.

Estes pagamentos realizaranse unha vez se acredite a execución das súas tarefas asociadas e segundo os importes referidos no Anexo I que recolle o orzamento previsto por actividade e subactividade.

Tendo en conta a imposibilidade de calcular o importe exacto de todas as actuacións previstas no marco deste convenio, o beneficiario, con previa comunicación á Secretaría Xeral de Industria e Desenvolvemento Enerxético no seo da Comisión de Seguimento do convenio, poderá realizar modificacións entre as diferentes actividades e/ou subactividades sempre que se trate de minoracións iguais ou inferiores ao 20% dos importes previstos. Estas modificacións non poderán supoñer un incremento da achega establecida nin poderán afectar ás condicións de xustificación recollidas no presente convenio.

3. Para a acreditación á que se refire o punto anterior, CEAGA presentará á Secretaria Xeral de Industria e Desenvolvemento Enerxético, unha vez finalizadas as actuacións que se detallan na cláusula primeira deste Convenio e, en todo caso, coa data límite do 15 de decembro de 2026, a seguinte documentación:

3.1. Unha relación clasificada dos gastos nos que se incorreu, coa identificación do concepto de gasto, acredor e do documento, o seu importe, data de emisión e data de pagamento.

3.2. No que respecta aos gastos de persoal, serán xustificados presentando as nóminas do persoal asignado ao convenio e certificando o número de horas/mes imputadas dedicadas ao desenvolvemento das actividades sinaladas na cláusula primeira deste. Estas nóminas irán acompañadas dos xustificantes de pago e das cotizacións á Seguridade Social, sen prexuízo do indicado na cláusula quinta no referente aos calendarios de recadación.

3.3. As facturas e demais documentos de valor probatorio equivalente no tráfico xurídico-mercantil ou con eficacia administrativa, así como os xustificantes das transferencias bancarias, certificacións bancarias ou extractos bancarios, ou documentos obtidos a través da banca electrónica sempre que conten co selo do banco, acreditativas dos pagamentos polos servizos realizados.

En ningún caso serán admisibles os pagamentos xustificados mediante recibo do provedor. Nestes documentos deberán estar claramente identificados o receptor e o emisor do pagamento, o número e a satisfacción do importe total da factura (IVE incluído), así como o concepto ao que se refiren. No caso de que no documento de pagamento non se faga referencia ás facturas, deberá ir acompañado da documentación complementaria que permita verificar a correspondencia entre gasto e pagamento. No caso de que un xustificante de pagamento inclúa varias facturas, achegarase unha relación detallada das mesmas na que se poida apreciar que o pagamento se corresponda coas ditas facturas.

3.4. Tres ofertas de diferentes provedores cando o importe de cada gasto no que incorra o CEAGA sexa igual ou superior a 15.000€, IVE excluído. Cando polas especiais características dos gastos non exista no mercado suficiente número de entidades que o presten ou subministren, deberá achegarse unha xustificación de tal circunstancia. Se a elección entre as ofertas presentadas non tivese recaído na proposta económica máis vantaxosa, deberá achegarse unha memoria xustificativa.

3.5. Unha memoria final onde se xustifique o cumprimento dos obxectivos previstos e no que se describan de xeito individualizado as distintas accións desenvolvidas, produtos elaborados e as incidencias máis significativas no marco deste convenio. Nos casos nos que sexa posible, empregaranse indicadores obxectivos para medir o impacto logrado a través de cada acción.

3.6. No caso daquelas accións nas que se elabore documentación, materiais gráficos, folletos, fotografías ou calquera outro material en formatos analóxicos ou dixitais, xuntarase unha copia dos mesmos ou a ligazón a webs e outros espazos virtuais relevantes nos que poida acreditarse a súa existencia.

3.7. Declaración da titularidade da conta bancaria onde se debe realizar o pagamento.

4. CEAGA responsabilizarase da veracidade dos documentos presentados. Coa solicitude de pagamento deberá achegarse unha declaración responsable de que non existe ánimo de lucro e que os importes reclamados se circunscriben á satisfacción dos gastos nos que teña incorrido para a execución das actividades obxecto deste convenio. Esta declaración responsable deberá estar asinada dixitalmente pola persoa que ostente a representación legal da entidade.

5. En todo caso, a Consellería de Economía e Industria, a través da Secretaría Xeral de Industria e Desenvolvemento Enerxético, resérvase o dereito de solicitar toda a documentación que se considere precisa en relación coa realización das actuacións obxecto do presente convenio e calquera outra que estime oportuna para a correcta xustificación do gasto e o seu pagamento.

6. CEAGA manterá a disposición da Consellería de Economía e Industria ou de calquera organismo público con capacidade de fiscalización da Comunidade Autónoma de Galicia, tales como a Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

Sétima.- Comisión de Seguimento

Para facilitar a execución e desenvolvemento, así como o seguimento e cumprimento do presente convenio, constituirase unha comisión paritaria, formada por dous/dúas representantes de cada parte asinante. Esta Comisión actuará como órgano de vixilancia, seguimento e control do establecido neste convenio. Así mesmo, esta comisión supervisará a programación das accións concretas ás que se refire o convenio e avaliará e controlará as actividades realizadas.

A comisión reunirse en sesión constitutiva nun prazo non superior a un mes desde a sinatura deste convenio. Así mesmo, reunirse tantas veces como o soliciten as partes para analizar o grao de cumprimento dos obxectivos fixados, propor a resolución dos conflitos específicos que puidesen exporse e realizar calquera outra actuación de coordinación que se estime precisa.

Os dous representantes da Consellería de Economía e Industria serán persoal técnico vinculado á Dirección Xeral de Estratexia Industrial e Solo Empresarial e serán nomeados pola persoa titular deste departamento.

Os dous representantes de CEAGA serán propostos desde esta entidade.

O/A presidente/a da Comisión, que será un dos representantes da Consellería de Economía e Industria, terá voto dirimente.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, co capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

Oitava.- Vixencia e causas de resolución

Este convenio entrará en vigor o día da súa sinatura e terá vixencia ata o 31 de decembro de 2026.

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso do prazo de vixencia do convenio.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das dúas partes poderá notificar á parte incumplidora un requirimento para que cumpra nun prazo de 10 días hábiles coas obrigas ou compromisos que se consideren incumplidos. Este requirimento será comunicado á Comisión de Seguimento do convenio e á outra parte asinante. Se transcorrido o prazo indicado no requirimento persistira o incumprimento, a parte que o dirixiu notificará á outra parte asinante a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Introducción de modificacións substanciais sen que as mesmas se aceptasen pola Comisión de seguimento.
- f) Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, acordarán a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación destas.

Novena.- Modificación

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A dita modificación terá por obxecto a redución do volume das obrigas ou a ampliación do seu prazo de execución.

Décima.- Publicidade da subscripción do convenio

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006 de 20 de xullo, polo que se regula o Rexistro de Convenios da Xunta de Galicia, a Consellería de Economía e Industria publicará no *Diario Oficial de Galicia*, no Portal de transparencia e Goberno aberto e na súa páxina web oficial o importe da prestación económica concedida ao abeiro deste convenio e a entidade destinataria desta, e incluírá igualmente a referida contribución e as sancións que como consecuencia deste puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión aos órganos competentes da Consellería de Economía e Industria.

CEAGA deberá subministrar toda a información necesaria para que a Consellería de Economía e Industria poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

Undécima.- Propiedade intelectual

A documentación xerada como consecuencia da execución deste convenio será propiedade conxunta de CEAGA e a Consellería de Economía e Industria. Na medida en que a mesma sexa susceptible de protección mediante o réxime da propiedade intelectual, seralles de aplicación o disposto no artigo 7 do Texto refundido da propiedade intelectual, relativo á obra en colaboración.

A titularidade de todos os dereitos de propiedade intelectual inherentes á documentación elaborada será de CEAGA e da Consellería de Economía e Industria por ámbito mundial e polo prazo de protección dos dereitos de propiedade intelectual, de acordo coa normativa nacional e comunitaria aplicable.

Neste contexto, entenderase como documentación elaborada todos os informes, conclusións e análises resultantes que se obteñan como produtos vinculados ao desenvolvemento das actividades obxecto deste convenio.

Duodécima.- Responsabilidade

A subscrición do presente convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e a Consellería de Economía e Industria, de tal xeito que non se poderá esixir a esta responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

Décimo terceira.- Autorizacións

CEAGA consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, así como poderá exercer os seus dereitos de acceso, rectificación, cancelación e oposición respecto do contido dos rexistros antes citados ante a Consellería de Economía e Industria, con sede no complexo administrativo de San Caetano s/n, 15704, Santiago de Compostela.

Este consentimento esténdese á autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización á Consellería de Economía e Industria para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

Décimo cuarta.- Natureza e normativa

O presente convenio ten natureza administrativa quedando fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE, do 26 de febreiro de 2014, de conformidade co seu artigo 6, sen prexuízo da aplicación dos principios desa lei para resolver as dúbidas e lagoas que puidesen presentarse, consonte o previsto no seu artigo 4.

As partes comprométese a resolver de común acordo, ante a Comisión de seguimento, calquera controversia que puidese suscitarse sobre a interpretación ou execución deste convenio. En caso de conflito, as partes acordan o sometemento á Xurisdición Contencioso-Administrativa.

Para todo o non previsto neste convenio aplicarase o previsto na Lei 16/2010, de 17 de decembro, de organización e funcionamento da Administración Xeral e do sector público autonómico de Galicia, a Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non se opoña á Lei 1/2016, do 18 de xaneiro.

E, en proba de conformidade, as partes asinan o presente convenio electronicamente, tomando como data da sinatura a do último asinante.

Pola Consellería de Economía e Industria

Por CEAGA

ANEXO I
ORZAMENTO PREVISTO POR ACTIVIDADE

ACTIVIDADE	SUBACTIVIDADE	Orzamento 2026 (€)
Actividade 1: Plan de acompañamento	Subactividade 1: Mapeo de toda a cadea de valor da automoción galega	6.000
	Subactividade 2: Definición dunha folla de ruta de acompañamento ás empresas en risco	4.500
	Subactividade 3: Definición dun proceso e ferramenta de vixilancia e monitorización continua de empresas para identificar ameazas e sinais de alerta	4.500
	TOTAL ACTIVIDADE 1	15.000
Actividade 2: Plan de diversificación	Subactividade 1: Análise de oportunidades de diversificación en cadeas de valor complementarias	31.000
	Subactividade 2: Contraste dos resultados da análise anterior coas capacidades e potencialidades de diversificación das empresas integradas no plan de acompañamento.	8.500
	Subactividade 3: Asesoramento e apoio ás empresas con potencialidade e interese na diversificación	10.500
	TOTAL ACTIVIDADE 2	50.000
TOTAL		65.000